

四庫全書

經部

欽定四庫全書

經部

周禮訂義卷十三

詳校官監察御史_臣邱文愷

刑部郎中_臣許兆椿覆勘

總校官編修_臣王燕緒

校對官編修_臣王嘉曾

騰錄監生_臣李應坡

欽定四庫全書

周禮訂義卷十二

宋 王與之 撰

內宰下大夫二人上士四人中士八人府四人史八人胥八人徒八十人

鄭康成曰內宰宮中官之長

○愚案自內小臣以下皆內宰為之長

賈氏曰內宰治婦人之事對大宰治百官故稱內宰
大宰不稱外則兼統內

呂氏曰天子理陽道后治陰德風化並行故贊治之

官皆曰宰內宰屬之大宰意其治家之道亦權衡審訂於大臣格心之所自出歟

愚案宮中官不過三項宮正宮伯宿衛之官今之環衛是也宮人掌王寢洒掃次舍之事今之修內司是也至於內宰凡宮中之奄豎與諸嬪御皆在所統則今之內內侍省都知是也其體甚大其官甚尊其長以下大夫其屬無下士可謂尊矣

掌書版圖之灋以治王內之政令

賈氏曰書謂書之於版

○劉執中曰內宰所掌六宮之陰禮九御之婦職王內之

政令閭寺之法禁皆其所以為書○鄭鏐曰書所以教宮人如後世女則女訓之類○鄭康成

曰版謂宮中閭寺之屬及其子弟錄籍圖王及后世

子之宮中吏府官之形象

○劉執中曰宮內百職之名氏皆載於其版宮寢內

外之廬寺皆畫於其圖所以分宿衛之所居

○王昭禹曰王內后宮也○

鄭鏐曰小宰所治之王宮乃王之六寢此所治之內

宮蓋后夫人所居之宮乃王之北宮夫以王者之尊

嚴后夫人之寵貴而中宮之事乃以朝廷下大夫統

治而宰制之其意以為第禍既交則情與愛洽顏辭媚熟則公為私奪故雖宮闈之政令一以付之示大公至正以塞險詖私謁之原故名官曰內宰而使掌書版圖之法焉○黃氏曰康成謂政令施闈寺者非均稍食分人民皆為政令不獨施於闈寺均其稍食分其人民以居之

易氏曰鄭氏謂稍食為吏之廩祿人民為吏之子弟宮中恐非吏與子弟所得而至胡五峯疑官吏與妃嬪

雜處以經攷之自有明文秋官掌戮曰宮者使守內
蓋王內之職惟內小臣奄四人為上士其餘皆非命
士則知所謂宮者皆人民也以版圖之法治之如某
所為宮某所為寢某所為廬舍分以守之故曰分其
人民或謂國君不近刑人刀鋸之餘春秋所戒何至
后宮之遽嚴而刑餘之錯列歟是不然王內之人民
猶王宮之人民司隸帥四翟之隸以守王宮則責之
以守而已非近而親之也與後世親內官而疎外庭

者異矣

○陳君舉曰分其人民以居之只看目錄便無可疑天官一篇應于外朝盡用士人為之

至醢醢酒漿之屬却是奄人女奚自內宰而下內小臣寺人內豎至女史皆奄奚為之至於典婦功典絲泉染人屨人苟外有司可為者依舊是士人為之內司服與縫人又非奄人不可所謂分其人民只是許多奄人女奚女御在宮閭之執事者耳

○鄭鏐曰均其稍食與宮正所

均者同分其人民以居之與宮伯授八次八舍之職事同宮正宮伯所均所授者王之宮此所均所分者王之北宮所以不同

以陰禮教六宮

鄭司農曰陰禮婦人之禮

○王昭禹曰凡內事皆陰也后祭市謂之陰禮司徒

教親謂之陰

禮與此意同

鄭鏗曰周制后有六宮猶王有六寢正宮一以聽內事
燕宮五以息燕其制以一宮為中四宮處四角而正宮
一則在前不名曰寢乃曰宮者蓋寢則息燕之義宮則
隱蔽之言息燕非婦人所宜言而婦人以隱蔽為自重
故王謂之寢而后則名曰宮六宮者指后言之不曰王
后而曰六宮不敢斥言王后之尊與王同體不斥言示

訓也后為六宮所取正猶教以陰禮者蓋王后正位宮闈同體天王治亂因之興亡係焉能知陰禮則進賢才以輔佐君子哀窈窕而不淫其色裏謁不干于朝外言不入諸閭關睢之風行彤史之化修矣

以陰禮教九嬪

鄭鍔曰九嬪九人猶朝之九卿經曰內有九室九嬪居之外有九室九卿朝焉嬪居九室掌婦學之法以教九御祭祀則贊后賓客則從后所任為尤重不知

禮則上納王后於邪下帥九御為非矣故亦以陰禮
教之說者謂均名曰陰禮既言以陰禮教六宮又別
言以教九嬪何也蓋有王后之陰禮有九嬪之陰禮
教后以配王之陰禮其禮為大教九嬪以婦人之陰
禮異夫王后之所謂陰禮也故別言之以明其異○
鄭

康成曰教以婦人之禮不言
教夫人世婦舉中省文也

以婦職之灋教九御使各有屬以作二事

鄭康成曰婦職謂織紝組紃縫線之事

○王氏曰婦
職之法所以

事王及后共祭九御女御○王氏曰女御八十一人祀賓客之職法每九人則屬一嬪故謂之

九御○黃氏曰九御名官曰女御其於婦道有所未知也○王氏曰使各有屬使

屬於九嬪○杜子春曰二事絲枲之事○王昭禹曰

大宰以絲枲

之職任嬪婦內宰以絲枲之事作九御蓋九御勤於絲之事則天下無不蠶者九御勤於枲之事則天下無不績者○易氏曰二事之說鄭氏以為絲枲王氏新傳以為祭祀賓客之事非也二即貳也左氏載史墨之言曰物生必有兩有三乃至王有公諸侯有卿皆有貳也知王以三公為貳則知王后以三夫人為貳矣知諸侯以三卿為貳則知三夫人以九嬪為貳矣以至九嬪則貳之以二十七世婦二十七世婦則貳之以八十一女御正合此經各有屬之義○黃氏曰九嬪職曰掌婦學之法以教九御婦德婦言婦容

婦功婦功即婦職作二事者也與婦德婦言婦容皆為陰禮特言二事著女御之職也世婦以上無絲象二事必使內宰教九嬪者古人學必有師雖女子亦然故九嬪職謂之婦學不教世婦世婦知婦道矣

鄭鍔曰說者謂周制天子六宮自后而下有三夫人九嬪二十七世婦八十一御妻內宰宜皆在所教也獨教六宮教九嬪教九御上不及夫人下不及世婦何也蓋夫人猶王之三公坐而論道三夫人亦從論婦禮者三公不必備惟其人非明道者不可以處其位然不明婦禮豈可以處三夫人之職哉六宮之尊

猶且教之則三夫人從可知矣嬪之為賓也猶朝之九卿焉而婦則執婦道以事人者也於其尊而有賓道者猶且教之則世婦從可知矣

李氏曰男女之際人所甚重前哲備言之矣然而賢妃聖后之不世出亂國亡家者往往皆是蓋婦人之性陰昧而柔弱鮮克正者堯之試二女以嬪于虞以觀厥刑焉堯之二女其淵源非不善尚曰舜能以義理下其心則不漸以教不摩以禮其不行婦道明矣

夫后妃同體於王其次嬪御亦所愛幸一舉動足以
旋轉天地薄蝕日月其為禍福不可勝言矣並寵則
妬不答則怨憎則有讒言愛則有私謁府庫或為之
空刑賞或為之濫姦邪或為之昌忠義或為之盡冢
嗣或為之易帷薄為之不修社稷為之不食妹喜之
殺桀妲己之殺紂此類豈少哉成周內宰之職王宮
之中自王后而下至女御之卑皆受教皆習禮德皆
正言皆順無治容無廢功無侈服無衰道則閨門之

內何有不肅傳之天下何有不化關雎之不淫葛覃
之躬儉樛木之無嫉妬螽斯之多子孫卷耳之輔佐
求賢鬼直之莫不好德於此見矣王道安得而不成
乎

林之奇曰宮禁之密房闈之事內宰何能教之男女
之別正家所先未聞使外官治內事也后夫人以下
欲無驕侈嫉妬無讒言私謁在人君正身率之耳豈
使內宰教之乎舜以匹夫而妻帝女使執婦道于虞

氏書曰嬪于虞蓋以德化之也文王能使太姒之有德亦身率之耳詩曰刑于寡妻至于兄弟以御于家邦皆非使人而教之也

正其服禁其奇

紀宜反

衰

似嗟反

展其功緒

王氏詳說曰后六服夫人揄翟闕翟九嬪則鞠衣世

婦則展衣女御則綠衣此所謂正其服

○劉執中曰六服自存其

制不可踰此謂常居之服亦有物色可以僭上而邀寵者必正之尚德也

○鄭鏗曰惡莫

大於奇衰奇則怪而不常衰則僻而不正左道之禍

常由是生漢武帝后宮為方術所誤呪詛之變興巫
蠱之姦起以大逆亡道坐死者前後數萬人由不禁之
於早耳○鄭康成曰展錄也緒業也○鄭鍔曰既作
二事於前則當省其功緒於後作之而不省則勤者
不見知而怠者以嬉遊廢業

楊氏曰嬪婦內職也而列之天官之屬內宰涖之教
以陰禮婦職之法使各有屬以作二事禁其竒袤展
其功緒則內無曠職而作淫巧以蕩上心者不容於

其中矣其進御以時叙焉則便嬖暱寵之私亦無自
而有關睢化行雖曰后妃之德亦先王治國家中外
一體也後世先王之法廢中外離絕不相統一奇衰
無禁功緒不展而婦式之法不行焉逸居無教言德
功容不循正道妬寵相乘而嬖暱之私得以干其上
矣自周衰迄於漢唐女禍無世無之職此之由不遵
先王之成憲而能正家而天下定者未之有也

大祭祀后裸

古亂反

獻則贊瑤

音遙

爵亦如之

鄭鍔曰周制王后無祭天之事則大祭祀者祭宗廟也○王氏詳說曰王以圭瓚酌鬱鬯裸后以璋瓚酌鬱鬯裸王以玉爵酌醴齊朝獻后亦如之王以玉爵酌盞齊饋獻后亦如之若夫后所酌瑶爵者謂獻尸時也蓋王之獻尸以玉爵酌醴齊后之獻尸以瑶爵酌盞齊是九獻之禮后與王之所以相為異同也○賈氏曰已上三事內宰皆佐后裸時以璋瓚授后獻時以玉爵授后故云贊也瑶爵亦如之后亞王而酌尸則內宰以瑶爵授后亦贊之也○鄭鍔曰后當行裸獻之禮內宰贊其事使不失節至於用瑶爵以獻之

時則亦贊焉鄭康成謂瑶爵者尸卒食王既酌尸后亞獻之其爵以瑶為飾然考之於禮既裸之後從獻之時王以玉爵酌盃齊后以瑶爵酌醢齊自三獻以至九獻王皆以玉爵后皆以瑶爵康成特指七獻之時所用之爵恐非也

○史氏曰瑶王之

次公劉之詩曰維玉及瑶后之爵降王一等以瑶為之示次玉也

正后之服位而詔其禮樂之儀

鄭鍔曰后之服六而祭祀之服所用不同祭各有位而后之位所立各異如祭先王則當禕衣祭先公則

當揄狄祭羣小祀則當闕狄是正其服也如君在阼則夫人在房君西酌犧象則夫人東酌鬯尊是正其

位也○鄭康成曰薦徹之禮當與樂相應

○王氏曰告以出入

進止之節使與禮樂相應 王昭禹曰記曰禮交動乎上樂交動乎下詔其儀則使其容比於禮其節比於樂

贊九嬪之禮事

鄭鍔曰當奉祭祀之時九嬪即贊后薦徹豆籩九嬪所舉應禮則后之所舉得禮矣宜有以贊之

凡賓客之裸獻瑤爵皆贊

鄭康成曰謂王同姓及二王之後來朝覲為賓客者

裸之禮亞王而禮賓

○賈氏曰大行人上公再裸而酢謂王先一裸次后再裸也裸

時大宗伯代后至于拜送則內宰亦贊后拜送爵

獻謂王饗燕亞王獻賓也

瑤爵亞王酬賓也坊記曰陽侯殺穆侯而竊其夫人故大享廢夫人之禮

王昭禹曰先王承賓猶承神故大饗之禮惟不入牲其他皆如祭祀是以祭祀后有亞裸亞獻與瑤爵獻

尸之禮而賓客亦如之裸獻則王禮賓客而后亞獻
瑤爵則王酬賓客而后亞王酬賓客○王氏曰不言
后以上文裸獻瑤爵言后從可知也

致后之賓客之禮

鄭康成曰謂諸侯來朝覲及女賓之賓客

○史氏曰后之賓客

公卿大夫之妻而外之命婦亦然○賈氏曰致后之賓客之禮者謂若酒正致后之賓客之禮其掌客致夫人之禮彼諸侯夫人致禮於賓客之法明后亦致牢禮於賓客鄭注掌客凡夫人禮皆使下大夫致之則此內宰亦下大夫也女賓之賓客謂畿內同姓諸侯夫人有會見王后之法亦致禮焉

凡喪事佐后使治外內命婦正其服位

賈氏曰喪言凡則王及后世子以下皆是內宰佐后使其屬官治外內之命婦○鄭康成曰使使其屬之

上士內命婦謂九嬪世婦女御○鄭司農曰外命婦

卿大夫之妻王命其夫后命其婦

○賈氏曰夏殷之禮爵命不及於士

周之禮上士三命中士再命下士一命夫尊于朝妻榮于室則士妻亦為命婦可知不言三夫人三夫人

從后不在治限○王昭禹曰凡喪事則外內命婦皆有衰麻

之服哭泣之位

○賈氏曰正其服之精麤位之先後

而其事則有治之

者后之所使內宰所佐也

凡建國佐后立市設其次置其叙正其肆陳其貨賄出

其度量淳

諸允反

制祭之以陰禮

劉執中曰朝以聽天下之政故君立之天道也市以聚四方之貨故后立之地道也○禮庫曰周制國君夫人世子命夫命婦過市皆有罰所以別朝市辨義利分貴賤今內宰却佐后立市市井之令出於房闈之中此漸不可長而況宮中之秘密却與市井之事

其意果安在

○愚案此特體地道以始立市耳既立則后何預其事○王氏詳說曰洛邑營

於周公攝政之五年此書作於六年是朝市之位已立矣何於此而復佐后立市乎是知此書周公作之為天下後世法
○王氏曰次其官之次則司市所謂思次介

次是也

○王氏詳說曰司市云以次叙分地而經市以陳肆辨物而平市所謂思次者市師涖焉

所謂介次者胥師賈師涖焉此設其次也

叙其地之叙司市所謂各於

其地之叙是也肆謂陳物之肆肆長所謂各掌其肆

之政令是也

○史氏曰肆鋪設

○鄭康成曰陳處也

○賈氏曰為有

諸物皆陳列之

度丈尺量豆區之屬○杜氏曰淳讀為純純

謂幅廣制謂匹長

○賈氏曰趙商問天子巡守禮制丈八尺純四積何答云制丈八尺

咫八寸四咫三尺二寸又大廣四當為三字三八二十四二尺四寸幅廣也古三四積畫是以三誤為四

也 ○鄭康成曰陰禮婦人之祭禮

○史氏曰市成而祭后既與焉謂之

陰禮可也○王氏曰市陰也陰以作成效法為事祭之宜象其事焉○劉執中曰祭之以陰禮神地之道使民信而不欺

中音仲春詔后帥外內命婦始蠶于北郊以為祭服

鄭鍔曰觀祭義之篇曰古者天子必有公桑蠶室近川而為之築宮仞有三尺棘墻而外閉之及大昕之

朝卜夫人世婦之吉者入蠶于蠶室及獻繭遂朱綠
之玄黃之以為黼黻文章服既成君服以祀先王先
公敬之至也蓋王者以奉宗廟為重以躬致其服為
盡孝故王以躬耕之穀為染盛后以親蠶之絲為祭
服然蠶必以時時至而不詔告之則有失時之愆中春
者可蠶之候也時則詔后帥外內命婦以共事必于
北郊者婦人受陰之義說者謂月令季春之月鳴鳩
拂其羽戴勝降于桑后妃齋戒親東鄉躬桑而先儒

於祭義大昕之注亦以為季春朔日今此仲春詔后何也然以七月之詩攷之春日載陽有鳴倉庚女執懿筐爰求柔桑謂仲春也倉庚以仲春鳴記禮者乃言季春豈仲春者蠶事之始歟謂之始蠶意可知矣○李氏曰普天之下蠶者非一女而后猶親蠶天下之女子有不遵微行求柔桑者乎耕者非一男而后猶佐天子之耕天下之男子有不饑南畝喜田畯者乎○張氏曰周自后稷歷世相傳其君子則重稼穡之事有室家則躬織衽之勤相勉不忘乎艱難此

王業之基也故葛覃之詩曰為絺為綌服之無數而序以為后妃之本後世幽王惑褒姒而廢申后以召犬戎之禍而詩刺之曰婦無公事休其蠶織蓋推其禍端良由稼穡織紝之事不聞于耳不動于心以至

此於
歲終則會內人之稍食稽其功事

王氏曰內人王內之人

○王昭禹曰謂之王內以內屬於王謂之內人以內屬於

內○賈氏曰案典婦功授嬪婦及內人女功之事齋嬪婦既是九嬪世婦明內人是九御

○賈氏

曰稽猶計也功事絲枲之事

○王昭禹曰展而視之非一時稽考其成而已

展言緒則所展者功之綸緒稽言事則所稽者功之成事

○王氏曰既均其稍食

歲終則會之既展其功緒歲終則稽之

佐后而受獻功者比其小大與其麤良而賞罰之

王昭禹曰典婦以功獻於后內宰則佐后而受之鄭

康成曰獻功者九御之屬

賈氏曰布帛之等縷小者則細良縷大者則麤惡今言麤不言惡言良不云細者互見其義○王氏曰小大比其制麤良比其功制中度功中程而又善則在所賞制不中度功不中程而又惡則在所罰

會內宮之財用

鄭康成曰計夫人以下所用財○王氏曰會內宮之財用為大宰歲終受其會故也

正歲均其稍食施其功事憲禁令于王之北宮而糾其守

賈氏曰正歲建寅之月○鄭康成曰均調度○王氏曰稍食歲終既會之矣正歲又均焉功事歲終既稽之矣正歲又施焉

鄭康成曰北宮后之六宮謂之北宮者繫于王言之

明用王之禁令令之

○王昭禹曰有謂之內宮有謂之北宮言內宮則知王宮為外

言北宮則知王宮在南

守宿衛者

○賈氏曰謂若宮伯所掌士庶子糾其惰慢者也

鄭鍔曰內宰於內人之稍食何其切切耶於每歲之終則必會之於正歲之始則必均之歲終者周人之歲十月也正歲者夏人之歲正月也十月必會者謂一歲之終則一歲之功事已成食一歲之廩稍則宜一歲之功事可稽矣於是之時會之者所以稽其一

歲之成效是故佐后受其所獻之功乃比較其小大
與其麤良以行賞罰於是時又併與一歲之財用皆
會之因一歲之費而責一歲之效如此其嚴正月必
均者謂一歲之始則一歲之工事始施始焉不均其
廩稍則終焉不敢責其成效於是之時均之者所以
施其一歲之功事功事已施於是表揭禁令於北宮
又從而糾其所守使無敢遊觀而去守以妨一歲之
功事故特指王之北宮言之則因一歲之始而施一歲之

事如此其嚴然則切切於內人之稍食豈徒然哉

上春詔王后帥六宮之人而生種

直龍反

種音六

之種而獻之于王

賈氏曰上春亦謂正歲以其春事將興故云上春○

鄭康成曰六宮之人夫人以下分居后之六宮者古

者使后宮藏種以其有傳類蕃孳之祥必生而獻之

示能育之使不傷敗且以佐王耕事共禘郊也

○劉執中

曰種必生於六宮以其有地之道生生不窮之祥○
史氏曰凡種稜之種必藉后宮生之者欲其亦知稼

穡之艱難不然外庭之臣豈乏
司農司穡必待出於六宮之手

○鄭鏗曰經言三農

生九穀固不一種獨於種稂之種則三言之司稼辨之而縣于邑閭舍人縣之於歲時內宰生之於上春皆以種稂為言則知種稂非九穀也司農謂先種而後熟則謂之種後種而先熟則謂之稂言生種稂之種則凡九穀之或先種後熟或後種先熟者皆生之也觀詩人有黍稷種稂之言謂黍稷之有先後然則非指種稂為穀明矣

總論

鄭鍔曰后之尊與王同體賓客之來則有禮賓之事
祭祀之時則有助祭之事建國則立市共祭服則親
蠶耕藉則獻種歲終又受后宮獻種之事則為后者
不為無職立內宰之官或佐之或贊之或詔之或正
之如是其詳然先王之意不止此耳中宮之貴椒房
之寵命下大夫為之宰以治宮中之政令則制以天
下之公法實所以杜驕侈之原

陳君舉曰嘗讀關雎知三代而上后妃極天下之選

矣后妃母儀天下而嗛嗛然有不足配至尊之意當
是時夫人嬪若干人世婦若干人女御若干人各以
其職奉上所以共賓祭蕃子姓之官備矣后方惻然
遐想幽深側陋之間尚有遺賢宜配君子求而不可
得則中夜不寐展轉歎息庶幾得之吾當推琴瑟鐘
鼓之奉與之偕樂而後慊后德如此則宮掖之政一
以聽后之所為奚不可者今內小臣而下凡閹官九
嬪而下凡婦官下至於女奴曉祝者曉書者曉裁縫

者必屬之大臣則夫員數之增損職掌之廢置祿秩之多寡賜予之疏數皆稟命於朝廷而后不與且使內宰得以稽其功緒而賞罰其勤惰苟違有司之禁雖天子不得自以為恩是故私謁不行而內政舉古之所謂正家者蓋如此

內小臣奄上士四人史二人徒八人

鄭康成曰奄稱士者異其賢

○賈氏曰上酒人漿人等奄並不稱士則非士

也用奄者以其所掌在內故也○呂氏曰奄位極於上士先王防患之意蓋微○李氏曰周

禮之內餘奄皆不命宦官之位天象所有指其居次或在帷薄之內論其職掌或聞牀第之言固不可以詘辱俊乂渾毅男女用奄人是乃制事之宜

愚案先王之時宦者不過數十人內小臣四人寺人五人內豎五人閹人每門四人而已不若後世之多既總於內宰而內宰又屬於冢宰上下相統得以進退用舍之則不賢者自不容於其間後世不然宮中官則皆奄人既不屬宰相所以縱橫而

莫制

掌王后之命正其服位

鄭康成曰命謂使令所為或言王后或言后通耳

王昭禹曰正其服則后之六服所用不同正其位則祭祀賓客喪紀所以為禮者其位不同○王氏詳說曰有王之服位有后之服位有王之命令有后之命令夏官太僕小臣之於王天官內小臣內豎之於后其職一內小臣云掌王后之命正其服位后出入則

前驅大僕云掌正王之服位出入王之大命王出入
則自左馭而前驅是大僕之職與內小臣同內豎云
掌內外之通令凡小事小臣云掌王之小命詔相王
之小法儀是小臣之職與內豎同然大者掌其大小
者掌其小大僕小臣之所由分則內小臣所掌宜若
掌后之小命乃曰掌王后之命至其通令與凡小事
則內豎掌之此足以見后之次於王矣況后言命而
不言大命王后雖有好令於卿大夫曾何大命之有

是知大命皆在於王也周之時后且不預王之大命
況其他乎○鄭鍔曰內宰於后之服位則正之而內
小臣亦正之內宰正之於大祭祀之時內小臣正之
於宮闈之中

后出入則前驅

史氏曰前驅者前訶肅衆

○賈氏曰小臣是
奄人與后導道

若有祭祀賓客喪紀則擯

賈氏曰祭祀賓客喪紀此三事后皆有事則與后為

擯贊

○鄭康成曰擯為后傳辭有所求為

詔后之禮事相

息亮反

九嬪之禮事正內人之禮事

鄭康成曰詔相正者異尊卑

○賈氏曰詔相正皆是上擯后尊故云詔詔告

而已九嬪稍卑則言相相佐助之女御卑直正之而已

徹后之俎

鄭康成曰俎謂后受尸之爵飲於房中之俎

○賈氏曰天子

諸侯祭禮亡案特牲薦俎乃受尸之酢次主婦酌尸尸酢主婦於東房中受尸之酢亦有薦俎后之俎小臣所徹亦約與士禮主婦之俎同也○易氏曰膳夫言凡王祭祀賓客

則徹王之胙俎胙亦俎也尸與賓之胙王其胙有饌
饌皆有俎故謂之胙俎后亞王之裸獻瑤爵則其胙
俎一也徹后之俎而不言胙者胙以王為主后亞王

而已

○王氏詳說曰后之俎而不言胙者鄭氏謂后受尸之爵飲於房中之俎是亦胙俎之謂也蓋

尸之胙王與夫賓之胙王其俎皆謂之胙俎但胙俎為至尊之俎后不言胙者屈其尊故耳

后有好

呼報反

事于四方則使往有好令於卿大夫則亦

如之

易氏曰好事則以物問遺於諸侯之親者好令則以

言問勞於卿大夫之親者

○史氏曰后之族有尊后之族有親遠在四方豈得

愬然不與之接其饋餉問勞之禮乎故好事好令則內小臣得馳傳而往焉其曰卿大夫者卿大夫之家也○賈氏曰后有族親在四方謂畿外諸侯於王有親若魯衛晉鄭之等也於卿大夫亦謂同姓族在朝廷者

○陳及之曰胡五峯謂婦人無外事以貞潔為行若外

通諸侯內交羣下則將焉用君哉人臣尚無境外之交

曾謂王后可乎其疑是矣而未足也先王之政以端

本澄源為先故擇配之際必得賢妃貞女以配君子

其憂在進賢不淫其色見於關雎尊敬師傅化天下

以婦道見於葛覃求賢審官而無險陂之行見於卷耳於是有內宰之官以陰禮教六宮以陰禮教九嬪以婦職之法教女御自三夫人以下莫非賢婦人況王后乎若是而外通諸侯之懿親內交卿大夫之賢者不過助天子政治而已古者天子享諸侯有王后亞獻之禮上公來朝夫人致禮八壺八豆八籩膳大牢致享大牢侯伯來朝亦如之子男來朝夫人致禮六壺八籩如曰婦人無外事亦甚不可矣是故欲行

周禮者當自天子一身始以正心誠意為之本以之
齊家以之治國以之平天下則政事無一不善處不
然外通諸侯內交羣下相與連根固蒂是幽后所以

亡周豈周公舊典乎

○鄭鏞曰唐明皇時宦官用事
殿頭供奉委任華重持節傳命

震動四方所至郡縣奔走獻遺動以
萬計卒成大亂非此內小臣比矣

掌王之陰事陰令

鄭康成曰陰事羣妃御見之事陰令王所求為於北

宮

閤人王宮每門四人圍游亦如之

鄭康成曰閤人司昏晨以啓閉

○王昭禹曰不以晨門名官而謂昏者蓋

守中門尤宜謹於昏故曰閤人

愚案其職云掌守中門之禁惟雉門耳此言每門

者言中門據有禁守者言之其實王之五門使墨

者守

○賈氏曰此掌戮文鄭注謂黥者無妨於禁御○黃氏曰禮家說王宮五門則二十人圍

游之數不著成康之世刑措不用其守門者安能有墨哉漢文帝廢肉刑至景帝遂募死罪為官或

以為王有五門四面皆有中門故曰每門義亦通

鄭康成曰園御苑游離宮○黃氏曰游陂池文王靈
沼王宮嚴密之地不得不謹園游之地何必如是此
足以見內外一體皆所以嚴一人之奉初不以園游
而少忽也園游無間於王宮則燕游不足以損德○
薛平仲曰閤人專守王宮中門之禁中門蓋治朝之
外門於王內若不相關於園游亦非所及大宰列閤
人於內小臣之後且曰園游亦如之果何意哉蓋嚴
於內者當有以防於外而觀游之所尤隙之易以乘

閤人於中門之禁凡喪服凶器潛服賊器奇服怪民
皆有所不容入則離宮別苑之所御其防閑杜絕無
異於中門之禁則外防固已嚴矣彼寺人於此以相
道內人女宮之出入內豎於此傳達內外之通令孰
有不關於閤人哉今觀閤人於王宮每門凡四人則
舉中以見內外其所守於外者甚衆寺人於正內則
五人內豎之幼者則始倍寺人之數其所居於內者
甚寡守之者衆居之者寡周公經畫之密殆不可以

言語盡

掌守王宮之中門之禁

鄭康成曰中門於外內為中若今宮闕門雉門三門也春秋曰雉門及兩觀災○史氏曰中門之禁亦密於外門以其過此則是王之宮庭使內官掌之謂之

闔人以其所職專在守門若今所謂司門是也○賈氏曰

雉門外有臯庫內有應路故云於內外為中○鄭司農曰王有五門外曰臯門二曰庫門三曰雉門四曰應門五曰路門路門一曰畢門○鄭鍔曰王之五門皆有禁特使闔人守中門之禁何耶以朝士之官考

之外朝在庫門之外羣吏衆庶罷民窮民皆在其所
蓋外之二門臣民皆可得而入若夫雉門之內則應
門路門非臣民可得而妄入故於此有禁○王昭禹
曰以治朝在路門之外中門於治朝為已近守禁之
嚴於是
而始

喪服凶器不入宮潛服賊器不入宮奇服怪民不入宮

鄭康成曰喪服衰經凶器明器潛服若裘甲者賊器

盜賊之任器兵物皆有刻識奇服衣非常春秋傳曰

龙奇無常怪民狂易

○王氏曰孔子見齊衰者雖少
必作過之必趨蓋內有感惻則

外為之變動喪服凶器不入宮恐震動至尊潛服賊
器不入宮則嚴禁衛奇服怪民不入宮則王宜非禮

弗視非禮弗聽

○史氏曰王之太內常人尚不得入今此竒服怪民皆指宿衛之士非外人也外朝之宿衛既有宮正去其淫怠與其竒衰之民茲數者復禁而不入王及后者雖欲見不正之人不可得矣○黃氏曰此守中門者之職事也為命夫命婦闕與掃除設燎之事他門亦然

凡內人公器賓客無帥

色類反

則幾其出入

史氏曰內人應役之人公器應用之物賓客公卿大

夫之妻應得入見者然無帥者無所將帥非時而入

出者也故必幾察之防其乘間

○林氏曰所以防非常衛至尊之道

鄭司農曰幾謂無將帥引之者則苛其出入

○王氏曰幾微

察之也

以時啓閉

鄭康成曰時漏盡

○賈氏曰若夏至晝則日見之漏六十刻夜四十刻

○史氏

曰謹其鎖鑰

凡外內命夫命婦出入則為之闢

婢亦反

鄭康成曰內命夫知大夫士之在宮中者

○賈氏曰謂若宮正

所掌者對在朝卿大夫為外命夫外命婦則總外內命夫之妻內命婦即三夫人以下

辟行人

使無干

掌埽門庭

鄭康成曰門庭門相當之地

○賈氏曰闈人掌中門則門相當之地唯中門

若餘門各有守門者埽之

大祭祀喪紀之事設門燎

力名反

踞宮門廟門

鄭康成曰燎地燭

○賈氏曰謂若天子百公五十侯伯子男皆三十所作之狀蓋百根

葦皆以布纏之以蜜塗其上若今蠟燭對人手焚者為手燭故云地燭

蹕止行者廟在

中門外○易氏曰設門燎則設燎於門以為明蹕宮

門廟門則蹕止行者以致其肅

○王氏曰宮正凡邦之事蹕明所禁止者

廣閭人蹕宮門廟門明所禁止者門而已宮正宮中廟中則執燭明所照察者內閭人設門燎明所照察者門而已

凡賓客亦如之

賈氏曰賓客在宮中廟中謂若享食在廟燕在寢

史氏曰賓客之奉無異宮廟亦宜肅

寺人王之正內五人

鄭康成曰寺之言侍詩云寺人孟子

○賈氏曰此奄人案僖公二十

四年寺人披曰豈惟刑人披自稱為刑人明寺人奄人若然則寺人掌內人不掌男子矣秦詩欲見國君先令寺人者彼秦仲始大其官未備正內路寢○賈氏曰謂后之路寢若王之路寢不得稱內以後宮故云內先鄭內宰注后六宮前一後五前一則路寢

黃氏曰寺人內豎皆奄王之正內五人則他處尚有之經出不著員數蓋掌女宮戒令職事為不可已者已在此則在他處者未必有職事雖闕之可也

掌王之內人及女宮之戒令相導其出入之事而糾之

鄭康成曰內人女御女宮刑女之在宮者

○賈氏曰謂男女沒

入縣官為奴者○黃氏曰女宮女籛女酒之屬

史氏曰戒所以飭其怠令

所以趣其行○鄭鏐曰內人或有出入寺人則以身相之以言導之其或不如法者又從而糾之○鄭氏曰糾猶割察

王氏詳說曰內宰下大夫內小臣上士故內宰正后之服位贊九嬪之禮事內小臣詔后之禮事相九嬪

之禮事正內人之禮事若夫寺人初非士不過掌王之內人及女宮之戒令此貴賤之所以分也卑者不得統尊賤者不得臨貴

若有喪紀賓客祭祀之事則帥女宮而致於有司

鄭鍔曰帥女宮而致於有司以供其役使之事鄭康成云有司者宮卿世婦春官之世婦祭祀賓客喪紀掌女宮之宿戒及祭祀比其具故雖刑女以為役然下文又言佐世婦治禮事則指以為二十七世婦愚

謂康成指有司為春官世婦者鑿說蓋宮卿世婦以
卿為之又以下大夫貳之爵位之尊幾與大宰小宰
同列謂之有司或幾乎輕上爵然則有司者乃掌祭
祀賓客喪紀之有司耳

佐世婦治禮事

鄭康成曰世婦二十七世婦

○黃氏曰內人世婦自治禮事而寺人佐之故

其職曰掌祭祀賓客喪紀之事帥女宮而濯概為菜盛

掌內人之禁令凡內人弔臨

良鳩反

于外則帥而往立于

其前而詔相之

史氏曰前言戒令後言禁令戒者戒於未然禁者禁

於已然先後之序

○黃氏曰上言戒令謂在宮有警戒之令此又言禁令謂將出宮弔

臨於外故又有禁止之令

○鄭康成曰從世婦所弔若哭其族親

賈氏曰鄭知非其弔臨者案世婦職云掌弔臨於卿大夫之喪故內人得從之也

○史氏曰

內人弔臨于外非寺人帥之而往誰與監臨立於前

而詔相之衆安敢不肅

○鄭康成曰立其前者賤也賤而必詔相之者出入於王

宮不可

闕於禮

內豎倍寺人之數

鄭康成曰豎未冠者之官名

○史氏曰今所謂小黃門是矣取其輕捷而能

傳命○劉執中曰內豎奄之小者三代禮樂稱周為備

六寢六宮之奄寺人內豎其衆不過十人

掌內外之通令凡小事

鄭康成曰內后六宮外卿大夫使童豎通王內外之

命給小事者以其無與為禮出入便疾

○史氏曰掌王及后之令

故曰內外總內及外之傳命故曰通令○劉執中曰文王為世子朝於王季問內豎之御者曰安否何如

故曰掌內外之通令凡小事也
若大事則非童豎之可傳矣

若有祭祀賓客喪紀之事則為

于偽

內人蹕

鄭康成曰內人從世婦有事於廟者

○賈氏曰案下世婦職掌祭祀

賓客喪紀三事與此同明此內人從世婦而濯概及為染盛也

○史氏曰蹕所以止

行人肅喧譁

○王昭禹曰為內人蹕其所禁止者王內之人

王后之喪遷于宮中則前蹕及葬執褻器以從遣

反 奔戰

車

鄭康成曰喪遷者將葬朝于廟

○賈氏曰及葬執褻器以從遣車者謂朝

七廟訖旦將行在大祖廟中為大遣奠苞牲取下體天子大牢苞九個遣車九乘后亦同使人持之往如墓則內豎執褻器從遣車之後以其遣車載牲體神依之故使執褻器以從若生時褻器振飾

頽沐之器

○賈氏曰案特牲為尸而有槃匝并有單巾巾為振飾槃匝為盥手明其頽而沐髮

亦有之然王府褻器鄭注以為清器虎子與此不同者彼據生時故與牀第連文若死者器物雖皆不用仍法其威儀故此注為振飾頽沐之器不為清器虎子

史氏曰死者不可復生謂其魂氣之無不之也故必求其生平所近之人所用之器覲夫冥漠之間苟未忘情庶乎其隨之也故用內豎焉庶幾其以平昔而

不忘也

卷之三

三

同

三

周禮訂義卷十二

欽定四庫全書

周禮訂義卷十三

宋 王與之 撰

九嬪

鄭康成曰嬪婦

○王昭禹曰女之賓從於主謂之嬪書于二女言嬪于虞九嬪以賓從於

主為義故亦謂之嬪

昏義曰古者天子后立六宮三夫人九嬪

二十七世婦八十一御妻以聽天下之內治以明章

婦順故天下內和而家理不列夫人于此官者夫人

之於后猶三公之於王坐而論婦禮無官職

○黃氏曰鄭引

昏義六宮有三夫人以經考之恐非內小臣擯詔后
禮事相九嬪之禮事寺人佐世婦治禮事無擯佐夫
人者女御比士妻世婦比大夫妻九嬪比諸侯夫人
其言二十七世婦八十一御妻亦恐非周官大夫元
士不止於二十七八十一其為內外相敵之數未可
信也若曰數當立此以戒廣色則或恐是曰九嬪疑
若一娶九女因以名
之王娶下比諸侯

○薛平仲曰周官言夫人多矣

而夫人曾不列於官九嬪世婦女御又不言其數三
公固無官也嬪婦女御之以德進者不徒求以充位
也內宰自內豎以上皆所以紀綱王宮之治而九嬪
以下所以輔成王內之治者非法不立非人不行內

外蓋一道所以叙次之別如此

陳君舉曰婦人女子常與至尊幽居九重人弗得見
驕蹇自恣無所不至故使之分職於六宮附屬於冢
宰而天官內宰春官世婦又得以參檢其事與夫婦
妾賤人自相使令而無畏忌者不同矣漢高欲立戚夫
人子留侯曰骨肉之間雖臣等百人何益袁盎却慎
夫人坐文帝怒說以人彘乃從使大臣得與內事其
如是乎後世一女專恣而公卿附離之不暇尚何冢

宰之能率

掌婦學之法以教九御婦德婦言婦容婦功各帥其屬
而以時御叙于王所

賈氏曰婦學之法謂婦人所學之法所謂婦德婦言

婦容婦功也

○易氏曰內宰言其學之已成者故謂之陰禮九嬪言其學之未成者故謂之

婦職○王氏詳說曰內宰之教舉其要也九嬪之教致其詳也故以婦學為言○史氏曰九嬪受教於內宰謂之陰禮故能知內學之法法者規矩準繩也

○鄭康成曰九嬪以下九

九而御於王所九嬪既習於四事又備於從人之道

是以教女御

○鄭景望曰九嬪言教九御而不言教世婦則世婦亦必婦德之成者而後為

之○史氏曰教九御則世婦御妻內人皆在

○劉執中曰一曰婦德以柔

順貞潔為本而皆本於德

○史氏曰周南之詩無非后事關睢首篇明后妃之

德則德之為本固可知也惟其有德則外之為賢君子內之為賢婦人他或未能不害其為賢苟無其德徒有其言則婦有長舌維厲之階苟無其德徒有其容則色之蠱媚傾人之國苟無其德徒有其功則牝雞之晨惟家之索何足道哉惟其以德教之於前則三者自然類進故為婦道之全此教之法必先於

德二曰婦言者言其心之聲心懷溫柔則言溫柔心

懷正順則言正順

○鄭鏗曰婦有長舌維厲之階詩以為刺牝雞之晨惟家之索書以

為戒婦人之言其可妄出諸口
乎教以婦言者欲其寡訥也
三曰婦容者謂用禮

以正其容也容見於身則動根於德德以正其心而
禮以正其容故能步武成於宮商動靜中於禮樂詩

不云乎被之僮僮夙夜在公被之祁祁薄言旋歸○

鐸曰治容誨淫易係以為盜之招妻美而艷孔父所以見殺婦人之容其可以不婉婉乎教以婦容者欲其婉也
四曰婦功功者德行之實有德行以飭其身而

無功實以事其上雖有寵祿不足以自固矣故有宗
廟之祭祀籩豆之濯漑不可以不致其潔有王后之

奉養膳羞之精雋不可以不盡其心有祭服之玄黃
歲功之所施不可以不致其力有粢盛之饋食薦徹
之贊佐不可以不盡其禮

○鄭康成曰婦功謂絲枲
○鄭鍔曰教以婦功者欲

其知蠶
織也

驕侈之習與性俱成安知四事為不可忽所

以有賴於九嬪之教

鄭康成曰教各帥其屬者亦使九九相與從於王所
息之燕寢御猶進也勸也進勸王息亦相次叙凡羣
妃御見之法月與后妃其象也卑者宜先尊者宜後

女御八十一人當九夕世婦二十七人當三夕九嬪
九人當一夕三夫人當一夕后當一夕亦十五日而
遍云自望後反之孔子曰日者天之明月者地之理

陰契制故月上屬為天使婦從夫放月紀

○賈氏曰
謂月初畢

者為始望後尊者為先御見
之法無正文鄭以意消息之

○史氏曰嬪有九三倍

之為世婦九倍之為御妻各帥其屬帥其所分教者
以時進御於君故曰叙叙者有節而不亂蓋氣血有
限而顏色無窮苟無其節則耗億隨之

凡祭祀贊玉盥音盥贊后薦徹豆籩

賈氏曰祭祀之時男子進俎婦人設豆籩簠簋贊助

也助后薦玉盥○鄭康成曰玉盥玉敦受黍稷器賈○

氏曰豆籩言贊薦徹而玉盥直言贊不云薦徹明直贊進而已○鄭鍔曰故書以玉

盥為王盥王安石用其說乃謂下言贊后則上言贊

王言之序也以經攷之大宗伯奉玉盥小宗伯逆盥

肆師表盥盛告潔凡此皆贊王也禮官當贊王則九

嬪所贊者皆贊后謂為贊王非也○王氏詳說曰大

宗伯云奉玉齋小宗伯云辨六齋之名物使六宮之人共奉之是玉齋之事非王后之所奉然共齋者六宮之人奉齋者大宗伯進齋者后贊后之進齋者九嬪若夫籩豆之事雖存於有司而薦徹籩豆者后之事蓋婦人無非無儀惟主中饋況籩豆奉承宗廟得不為后之事乎至大祭祀后不預則大宗伯攝而薦豆籩徹醯人醢人皆以奄與女奚掌之所以知其為后之事明堂位曰君肉袒迎牲于門夫人薦豆籩是

已

若有賓客則從后

賈氏曰后有事於賓客謂助王享燕時九嬪則從后

往

○林氏曰九嬪之從后猶宗伯之從王

○鄭康成曰當贊后事

大喪帥叙哭者亦如之

賈氏曰大喪王喪○鄭康成曰亦從后帥猶道也后哭衆之次叙者乃哭○王氏曰大喪外宗叙内外朝暮哭者九嬪亦從后帥之

世婦

王昭禹曰執箕帚以事人者謂之婦記曰納女於天子備洒掃婦之事人有廣嗣之義故謂之世婦○鄭節卿曰天官世婦以廣嗣為義春官世婦卿以掌女宮之宿戒名同而官異不得不分內外○鄭康成曰不言數者君子不苟於色有婦德者充之無則闕

掌祭祀賓客喪紀之事帥女宮而濯概

古受反

為齋盛

鄭康成曰濯滌也概拭也為猶差擇

賈氏曰祭祀黍稷春人春之

無人炊之故知此世婦
非春非炊是差擇也
○鄭鍔曰所用之器則濯概

以致潔所奉染盛則差擇以致精先王之置世婦豈

徒奉左右以為悅哉其所掌者重矣
○王氏詳說曰少牢曰甕人概

鼎俎廩人概甗甗司官概豆籩是灌漑之事為男子
之職周禮以女官而濯概此所以與少牢異故曰周

之禮樂
庶事備

及祭之日涖
利音陳女宮之具凡內羞之物

鄭康成曰涖臨也
○賈氏曰案春官世婦宮卿云掌女宮之宿戒及祭祀比其具此官

直臨之
內羞房中之羞
○賈氏曰謂糗餌粉餈案少牢皆從房中而來○王昭禹

曰內羞則違人醢人為王及后世
子共之及祭之日世婦泣陳之

總論

劉執中曰王與后之祭祀賓客喪紀外有百執事各
帥其屬夙夜厥職非不可以備其物致其誠也必使
九嬪世婦躬泣乃事又俾女御從而觀焉蓋以婦人
不事于宗廟賓客喪紀則不知所以事上之道豈獨
使之致己之誠哉亦所以役之艱難俾盡其敬也此
關雎之后妃召南之夫人立教於前而周官所以帥

而習之於後

掌弔臨于卿大夫之喪

鄭康成曰王使往弔

○賈氏曰案司服公卿大夫皆王親弔之此又使世婦者蓋使

世婦致禮物但弔是大名雖致禮亦名為弔是以大僕云掌三公六卿之弔勞注云王使往小臣云掌士大夫之弔勞注云致禮同名為弔是其事也

○王氏曰世婦視大夫故使

弔臨于卿大夫之喪

總論

葉氏曰自古婦人之賢者蓋不易得故生則寢之地

以教其卑衣之裼以教其正弄之瓦以教其事既十年則姆教婉婉聽從執麻象治絲繭織紝組紃學女事以共衣服觀於祭祀納酒漿籩豆菹醢禮相助奠十五而笄二十而嫁先嫁之三月或教于公宮或教于宗室教以婦德婦言婦容婦功教成之祭牲用魚芼用蘋藻所以成婦順如此而後備於從人之道況夫王之北宮當貫魚之寵者可以非其人哉後世人主不擇德而以色甚者或取之倡優下賤如漢趙飛燕

李夫人之屬是也曲禮納女子于天子曰備百姓言以廣子姓耳深山大澤實生龍蛇母子傳類亦不可忽晉愍懷太子宮中為市使人屠酤手揣斤兩輕重不差其母屠家女也先王之制百二十人猶以無人而闕之其至難至謹如此

女御

鄭康成曰昏義所謂御妻御猶進也侍也

○王昭禹曰預於燕

寢之事則事之至賤非若婦有敵夫之意故但曰女御而已○史氏曰御之為言如馬之在御必俟人

鞭策然後遲速緩急不失節外有僕御內有婦御
皆職之賤亦有九嬪教以婦學使之不失於正

掌御叙于王之燕寢

劉執中曰九嬪云以時御叙者朔望尊卑之叙此言

御叙于王之燕寢者以九人長少為叙

○林氏曰小星詩曰進御

於君知其命有貴賤所謂御叙則有貴賤差別之名故也

○鄭康成曰于王之燕

寢則王不就后宮息

○王昭禹曰王有六寢一為路寢五為燕寢女御御叙之所九

嬪言王所此言燕寢實一也

○李氏曰女御掌叙于王之燕寢不

使九嬪世婦掌之防上之專妬蓋女御官卑不敢嫉

妬自專則內無怨女子孫衆多夫飲食男女人之大欲一有失時則大傷和氣七月女心傷悲東山婦歎于室安得聚少艾之色幽於深宮而無進御之路其情之感動如何哉

以歲時獻功事

王昭禹曰歲時者歲終之時典婦功所謂秋獻功是也○鄭康成曰絲枲成功之事

○史氏曰嬪婦化治絲枲女功之常女御

掌獻其事則其勤惰又有勸懲矣

凡祭祀贊世婦

王昭禹曰祭祀之事世婦所掌女御預贊之事○鄭

康成

曰助其帥
蒞女宮也

大喪掌沐浴

鄭康成曰王及后之喪○賈氏曰王及后喪沐浴用潘浴用湯始死為之於南牖下但男子不死於婦人之手今王之喪亦使女御浴者案士喪禮浴時男子抗衾則不使婦人今王之喪沐浴或使婦人而浴未必婦

人或亦供給湯物而已亦得謂之掌

后之喪持翣

所甲反

鄭康成曰翣棺飾持而從柩車

○黃氏曰案禮器云天子八翣又漢制度

皆戴璧后喪亦同將葬向壙之時使此女御持之左右各四人故鄭云持而從柩車

○王氏曰

后之喪持翣者女御以蔽飾后為事

從世婦而弔于卿大夫之喪

鄭康成曰從之數蓋如使者之介云

○賈氏曰世婦象大夫女御象

元士但介數依命數為差則王之大夫四命世婦之從亦四人

女祝四人奚八人

鄭康成曰女祝女奴曉祝事者○鄭鏗曰古者聖王設董祭之官絕地天通人神不相雜擾故無事於巫祝後世官廢神有不安其所而為妖於人人有不得其安而祈福於神聖人在上因人情而設巫祝之官是故在國祀之禮則有大祝甸祝詛祝之司在王宮則有女祝以女奴曉者四人為之

薛平仲曰人情莫敬於鬼神而鬼神易以惑莫畏於

簡書而簡書難以守惟知鬼神之有常禮則所以敬
之者不可得而惑惟知簡書之有公法則所以畏之
者有可得而守女祝之設所以使之敬鬼神鬼神之
禮定矣則妖誕之說果何自而入而巫蠱之禍亦何
自而見乎女史之設所以使之畏簡書也簡書之法
嚴矣則彤管之煒豈不甚可樂而靜女之刺何自
而作乎格其邪心於幽隱之微杜其私心於記錄之
遠女祝女史次於女御之後所以為王內之助者深

掌王后之內祭祀凡內禱祠之事

鄭康成曰內祭祀六宮之內竈門戶

○賈氏曰祭法王立七祀有戶

竈中雷門行泰厲司命后亦與王同今鄭直云竈門戶者以婦人無外事無行與中雷等其竈與門戶人所出入動作所由后亦當祀之也案月令春祀戶夏祀竈秋祀門后祀之時亦當依此○王昭禹曰內祭祀之在內者若五祀之類是也禱疾病求瘳祠報福

○王昭禹曰祈福曰禱賽禱曰

祠○鄭鍔曰內祭祀則宮中之祭是事之常也內禱祠則疾病之禱是事之非常也

掌以時招梗

古猛反

檜

古外反

禳

如羊反

之事以除疾殃

賈氏曰招者招取善祥梗者禦捍惡之未至禳者除

去見在之灾禳者推却見在之變異

○王氏曰禳以禳福禳以禳禍

禳以會福而以神仕者曰以禳國之凶荒民之札喪則弭凶荒札喪乃所以會福

此四者皆

與人為疾殃故云除疾殃也○王昭禹曰招梗者施於未然之前禳禳者施於已然之際招梗禳顧何施而不可然女祝掌其事亦固有時矣以男巫攷之春招弭以除疾病冬堂贈無方無筭則招梗者必於春之時禳禳者必於冬之時以春為一歲之始招祥

梗灾宜於時之始冬為一歲之終禮福禳禍宜於時

之終

○賈氏曰以時者謂隨其時不必在四時

陳君舉曰胡五峯謂宮闈不當有此且曰此殆漢世
女巫執左道入宮中為厭勝之事耳是蓋未察先王
之意古人通天人徹幽明動則有祭故食則祭先飯
桑則祭先蠶農則祭先嗇與夫祭行祭門祭竈祭表
貉祭先牧祭馬祖等類不一不惟不忘初之意蓋神
所在有之故所在祭之皆先王謹微之意所以自盡

焉外朝有司巫男巫女巫內朝有女祝所掌者大抵
類後世淫祀祈望非福然先王不以為不可必設官
以掌之者交三才之道也推其意皆為祈福祥求永
貞設而必若此者人臣愛上之祠華封之祝堯天保
之報上亦其義耳若曰人事既盡此等事一切勿講
則非聖人之意後世人主不脩人事祈望非福若秦
始皇漢武帝之求神僊梁武帝之奉佛法又非先王

事神之本意

○愚案孫說
見女巫後

女史八人奚十有六人

黃氏曰鄭曰女祝女奴曉祝事女史女奴曉書者蓋與女酒女漿同也酒人列職故女酒為女奴曉酒者漿人列職故女漿為女奴曉漿者可也女祝女史各自列職其事略如春官大祝大史故上聯嬪御與酒漿醢醢不同必非女奴也○劉執中曰女史八人蓋擇嬪御之賢者為之○張氏曰女史八人令執彤管在宮中書王后夫人之佐治宮女德之善惡及進御

煩碎之事皆書之故宮女懼而修德○鄭鍔曰古者天子有史官左記言右記動故為天子者不敢有過舉后與王同體言動不謹則家道不齊無以舉天下之內治故有女史

○愚案薛平仲說見女祝

掌王后之禮職掌內治之貳以詔后治內政

王昭禹曰王后之禮各有所職若祭祀之禮則有薦徹賓客之禮則有獻酬其職女史掌之王后以禮動當以其職告上○鄭康成曰內治之法本在內宰書

而貳之

○王氏曰貳
內宰之所掌

逆內宮

鄭康成曰鈎考六宮之計

○賈氏曰謂六宮所有費
用財物及米粟皆當鈎考

之○王氏曰
治正后宮

書內令

鄭康成曰后之令

○賈氏曰書
而宣布六宮

凡后之事以禮從

賈氏曰大史以書協禮事執書以詔王此女史亦執

禮書以從后

○王氏曰以禮籍從焉詔后故也

○史氏曰施之於事

曰治內政攷女宮以計曰逆內宮紀后之命曰書內令繼之以凡后之事以禮從則知后之言動皆當合於禮是故戒慎於所不覩恐懼於所不聞則於禮也庶幾其可書矣

典婦功中士二人下士四人府二人史四人工四人賈四人徒二十人

鄭康成曰典婦功者主婦人絲枲功官之長

○宮正疏曰諸

言典者出入由已課
彼作人故謂之典

○陳君舉曰凡三官悉用士人

先王以此人主奢儉所係國家利害所關非士大夫
為之則害國亂政必不得已與內宮相關通如內小
臣縫人之類則用宦者耳○賈氏曰有賈四人者以
其絲象有善惡貴賤則須賈也○史氏曰婦人女子
嫉妬貪鄙驕奢淫佚皆起於飽食終日無所用心今
使之趨作不倦則心之所存日在於此不見異物而
遷正有賴於典婦功

掌婦式之灋以授嬪婦及內人女功之事齋

音咨

王昭禹曰式言所用之式法言所治之法所用之式則多寡之數所治之法則精麤之度知其所為之法

然後可授其為女功之事齋

○劉執中曰婦有貴賤則職有重輕授有多寡

則功有麤良故有婦式

○鄭鏗曰或謂大宰有嬪婦化治絲枲

謂之任萬民則指民間之嬪婦言也今此典婦功之官掌授嬪婦女功之事齋鄭康成謂容國中婦人賢善工於事者若如是說則民間嬪婦皆授絲枲於宮

然後為布帛官何以給之哉此言嬪即九嬪也言婦即世婦也彼皆舉婦功於宮中宜給以布帛之齋非民間任化治之職者何以知之以其言掌婦式之法以授嬪婦及內人女功之事齋推之可知蓋上言嬪婦下言內人非王宮之嬪婦而誰歟又況所獻之物為以共王及后之用又頒于內府則非民間嬪婦之所化治明矣

○賈氏曰內宰作二事及婦功惟據九御而言不言九嬪世婦有絲枲之事鄭以九

嬪世婦者惟三夫人無職九嬪已下皆有之然女御四德不備故須教之九嬪世婦素解不須教也○黃

氏曰九嬪世婦通乎諸侯夫人大夫妻典
絲所謂內外工也及內人殊之於嬪婦

鄭康成曰事齋謂以女功之事來取絲枲

○史氏曰授其齋者

給其絲枲之物○黃氏曰事齋治絲枲之事及轉致雜費

凡授嬪婦功及秋獻功辨其苦

音古

良比其小而賈

音嫁

之物書而揭

其列之反

易氏曰鄭氏謂授當為受非也當為授字謂授嬪婦

功之後及秋獻功耳○鄭司農曰苦讀為監謂分別

其縑帛與布紵之麤細皆比方其大小

○賈氏曰司農之意以典

婦功是都司總掌故分別布帛其典絲唯主
絲絲其良者也典象唯主布帛為苦者也

史氏曰辨苦良工有巧拙也比小大功有等差也賈
之者估其直之低昂書而揭之者榜其物以見凡目
○鄭景望曰典婦功典絲典象皆揭賈何也其亦日
省月試既廩稱事以勸勵百工之意

以共王及后之用頒之于內府

黃氏曰典婦功詔典絲典象共之

○賈氏曰於典絲
典象處受其良好

者入此典婦功藏之以待王
及后之用故藏之於內府也
○王昭禹曰頒之於內

府者所以待邦之大用共四方使者及好賜之所用
典絲下士二人府二人史二人賈四人徒十有二人

史氏曰天下之絲皆出於蠶一蠶所吐謂之忽五忽
謂之絲則一絲之得亦不易矣後世親蠶之禮廢衣
服悉備於四方之士貢故取之盡錙銖用之如泥沙
無一分顧惜由其不知所自來典絲之職亦先王恭
儉節用之一助

掌絲入而辨其物以其賈楬之掌其藏與其出以待興

功之時

黃氏曰凡絲皆掌其入是亦為一府藏也典象亦然
鄭康成以絲入為九職嬪婦所貢絲非也問師任嬪
以女事貢布帛不貢絲此當是九貢禹貢兗州厥貢

漆絲青州厥貢絲象

○賈氏曰后宮所蠶之絲自於后宮用之以共祭服不入典絲

其歲常貢之絲若禹貢兗州漆絲之等且餘官更無絲入之文亦當入此典絲也辨其物者謂絲有善惡麤細不同
○王氏曰以其賈楊之防其賤質貴○黃氏曰以其賈楊

之將以為授功獻功之程

鄭康成曰絲之貢少藏之出之可同官也時者若温

媛宜縑帛清涼宜文繡

頒絲于外内工皆以物授之

黃氏曰外内工九嬪世婦及諸侯夫人大夫妻○賈氏曰

上典婦功授嬪婦功鄭以為九嬪世婦此注内工直云女御者案内宰教女御作二事九嬪教九御以婦職則女御專於絲象九嬪世婦四德自備不常為絲象假使為之以其善事所造惟典婦功以共王及后所用不在典絲典象
○賈氏曰以物授之若縑帛則授以素絲

若文繡則授以綵絲○王昭禹曰亦防其以賤質貴

凡上之賜予亦如之

鄭康成曰王以絲物賜人

○王昭禹曰賜予所用者有貴賤不同亦皆以其物

授之

及獻功則受良功而藏之辨其物而書其數以待有司之政令上之賜予

黃氏曰鄭康成改良為苦非也又曰其良功典婦功受之亦非也典婦功掌授功之政令典絲典象掌其出入典婦功非府藏之官猶大府之於內外府良功

絲功縑帛

○鄭鍔曰典絲之職以絲為主則獻功之時受絲功之縑帛故曰受良功蓋物之美

有曰良絲視麻為至美對苦而言則良為精苦為麤故有苦良之義對縷而言則絲功謂之良功麻功謂之苦功良功絲之縑帛典絲受之苦功麻之布縷典稟受之與典婦功之所受者不相干典婦功於秋獻功則受嬪婦之功受齋於典婦功之官故彼得而受之非此典絲所頒之絲彼所謂辨其苦良者謂嬪婦之功有苦良耳

○王昭禹曰有司之政令若司服弁師所司

之政令

○劉執中曰待有司之政令謂給邦之百用

玉府言王之好賜內

府言王及冢宰之好賜予此言上之賜予又非特王

及冢宰而已蓋王后夫人所用皆在是矣

凡祭祀共黼畫組就之物

鄭康成曰以給衣服冕旒及依盥巾之屬白與黑謂之黼采色一成曰就○薛氏曰天子之中曰黼巾位曰黼依無非黼也天子佩白玉而玄組綬素絲組之良馬五之則馬與佩亦用組也然祭祀之用絲者莫急於冕服黼畫則其服也組就則其冕也在衣而績在裳而繡黼之於裳則繡矣此曰黼畫者周人以黼為尚耳詩曰玄衮及黼書曰麻冕黼裳此典絲之所

以首黼畫也天子纁旒十有二就就成也曰組就者以組為就也故典絲言良工者其致美乎黼冕之意歟○史氏曰朱綠玄黃止為祭服而不敢他用知其難得也

喪紀其其絲纊

音曠

組文之物

鄭康成曰以給線縷著盱口綦握之屬青與赤謂之文○賈氏曰云線縷者釋經絲謂所裁縫皆用線縷也云著盱口綦握之屬者釋經纊組案士喪禮握手玄纁裏著組繫喪大記屬纊以俟絕氣內則云屨著綦鄭云綦屨繫是用纊組之事也云青與赤謂之

文績人職云文繡之屬亦用絲故連言也

○王昭禹曰喪紀有用絲以為

線縷有用績以充衣褥或用組文以為物之飾

凡飾邦器者受文織音絲組焉

鄭康成曰謂茵席屏風之屬

○賈氏曰上既言祭祀喪紀所用此云飾邦器

據生人所飾器物言茵者謂若少儀云枕几茵類之等鄭云茵者縛也云席者謂席之四緣若司几筵紛純之等屏風者即上文注黼依也但上據祭祀此據王所用若司几筵之扆前者是也 ○王昭

禹曰文織以文為織絲組以絲為組文織絲組所以

為飾邦器之用

歲終則各以其物會之

鄭康成曰種別為計

○鄭司農曰各以其所飾之物會計傳著之

○王氏

曰典絲典枲歲終各以其物會之防其以賤貿貴

典枲下士二人府二人史二人徒二十人

王昭禹曰麻之未緝者謂之枲典枲所掌其物非一

獨以枲名官蓋麻為女功之正

○鄭鍔曰布有出於麻者亦有出於草者

如葛如蘋可以為絺為絺是出於草者也然出於麻以衣被乎人者為多故雖布總縷紵出於麻草之不同而設官止以

○史氏曰觀葛覃后妃在父母家志

在女功之事以其躬歷女功知其物之難成則恭儉
節用服澣濯之衣固宜然言葛不言布者葛輕布重
舉輕以見重此葛覃之詩所以為后妃之本而典臬
之官助先王崇本之治為多

掌布總縷紵之麻草之物以待時頒功而授齋

鄭康成曰總十五升布抽其半者白而細疏曰紵

王○

昭禹曰紵則苧草之為布者草則葛之屬凡可以為
布者皆是麻草之物指其自然之質而言之布總縷
紵指其人為之功而言之布
總縷紵皆出於麻草之物
雜言此數物者以著其

類聚衆多草葛蒺之屬

○史氏曰布重而總輕

○鄭鏐曰總

者布之細者縷者綫孟子曰有布縷之征自其已成言之則曰布總縷紵自其本質言之則曰麻與草○

賈氏曰以待時頒功而授齋者典絲注用絲有四時之別此麻草所為四時皆得也授齋亦如典婦功所

注

○王昭禹曰授齋則授其所以為功之資與典婦功授齋同意

○史氏曰計其當

用之時授以麻草使為布總縷紵

及獻功受苦

音古

功以其賈楬而藏之以待時頒

鄭鏗曰苦功謂麻草所成之功非謂苦惡也指麻草

所成者為苦以見出於絲者為良功○愚案詳見典絲 ○史

氏曰揭其賈者物有等差時頒者衣服賜予之時冬

裘夏葛不可紊也○黃氏曰冬服司裘頒季秋獻功裘以待頒賜是也暑服典臬頒及

獻功受苦功以其賈揭而藏之以待時頒是也

頒衣服授之賜予亦如之歲終則各以其物會之

鄭康成曰授之授受班者帛言待有司之政令布言

班衣互文

王氏曰頒衣服授之賜予亦如之者頒衣服賜予皆以物授之言賜予而不言上以典絲見之○史氏曰歲終之會各以其物知其出納之數

總論

王昭禹曰先王之於婦職王后帥之以蠶內宰教之以二事九嬪又從而教之至於婦功則絲枲二物亦皆有官以典之及其獻功則后受之而內宰佐之典婦功又辨其苦良比其小大典絲之屬皆辨其物卑

而內人尊而王后皆相率以絲枲之事其詳至於如此天下之務惟本之為貴男子之務本於農耕女子之務本於絲枲苟不忘其本而先之於上則男有餘粟女有餘布邦之財用所為足也



周禮訂義卷十三

欽定四庫全書

經部

周禮詩義卷十四

詳校官監察御史臣邱文愷

刑部郎中臣許兆椿覆勘

總校官編修臣王燕緒

校對官中書臣高 中

騰錄監生臣朱上林

欽定四庫全書

周禮訂義卷十四

宋 王與之 撰

內司服奄一人女御二人奚八人

鄭康成曰內司服主宮中裁縫宮之長○史氏曰春

官有司服掌王之吉凶衣服今掌后之吉凶衣服者

不得以內司服別之

○鄭鍔曰司服一耳王之服掌於春官后之服掌於天官

玉者出與物接因以行禮於外為主春官掌禮故也
王后入與王接則以玉體於內為主天官掌王內之

政令故也○賈氏曰奄一人者以衣服事多須男子兼掌

與婦人同處故用奄○鄭康成曰有女御者以衣服

進或當於王廣其禮使無色過

○賈氏曰此女御選是女奴曉進御衣服

者故與女酒女祝女史同號女也得與八十一女御同名欲見百二十外兼有此女御之禮王合御幸之

使王無淫色之

過故曰女御

薛平仲曰上自王后以蠶事先天下下及命婦內人以絲枲效其功則女功之勤亦至矣人惟患己之不諳其勤也而後服飾之用或過侈而不顧知吾身所歷者為不易則吾身之所服者其敢易哉

掌王后之六服禕衣揄音狄闕狄鞠衣展衣緣吐亂衣

素沙

鄭鍔曰天子之服九王后之服六者蓋天子陽道九者所以取乎陽數之極王后陰道六者所以取於陰數之中天子之九祭服六常服三王后之六祭服三常服三王后無天地山川社稷之祭故服止於三或九或六無非取法乎陰陽之義○鄭司農曰禕衣畫衣祭統曰夫人副禕立于東房○賈氏曰禕衣亦是翟而云衣者以禕衣

是服之首
故言衣

○劉執中曰禕衣色玄所以象地而配天

子之玄袞天子大裘袞冕以玄為質所以配天○鄭

康成曰狄當為翟翟雉名伊洛而南素質五色皆備

而成章曰翬江淮而南青質五色皆備而成章曰搖

王后之服刻繒為之形而綵畫之綴於衣以為文章

○鄭鍔曰闕狄與禮記之屈狄之屈同

○王氏曰闕
狄謂之屈知

其屈於禕
狄而已

論語曰君子於其所不知蓋闕如也以翟

為飾比之禕揄二服刻為雉服而闕其數耳於禕衣

言衣而不言狄於揄闕言狄而不言衣者蓋禕言衣則知揄闕者亦衣也揄狄闕狄言狄則知禕衣亦狄也上下之文互見

鄭康成曰禕衣畫翬者揄狄畫搖者闕狄刻而不畫此三者皆祭服從王祭先王則服禕衣祭先公則服揄狄祭羣小祀則服闕狄○史氏曰翬與揄皆雉取雉者象德也夫雉者其交有時內之所守者正其羽五色外之所發者文質素而青仁義之全

○鄭康成曰以下推

次其色則禕衣玄掄狄青闕狄赤婦人尚專一德無所兼連衣裳不異其色

鄭康成曰鞠衣黃桑服色如鞠塵象桑葉始生月令

三月薦鞠衣于先帝告桑事

○鄭鍔曰鞠衣之色黃雖服以奉采桑之祭非

事宗廟之服故不入祭服之列

○鄭司農曰展衣白衣喪大記世婦

以禮衣禮與展相似

○鄭康成曰展衣以禮見王及賓客之服字當為禮禮之言亶

亶誠也詩云瑾兮瑾兮其之展也○鄭鍔曰事人之道以誠信為主而服展衣以見王與賓客故其色白

見其誠信潔白之道

○王氏曰祿衣之色黑而緣以纁

○王氏詳說曰

以祿衣為綠衣者此衛詩之文以祿衣為稅衣者此雜記之文以祿衣為純衣者此昏禮之文以祿衣為

男子所陳之衣此士喪禮之文
鄭康成曰御于王之服亦以燕居

史氏曰鞠衣黃衣黃者中也親蠶之服欲天下取中
也展色純白白者正潔之義以禮見王享賓客時服
也謂之展者展禮所用也緣衣純黑黑者至陰之義
至陰不動燕居時服也謂之緣衣太質無華以纁緣
之也夫天玄地黃黃者地道妻道天地嚴凝之氣始
於西南盛於西北白者西方之色陰之盛坎再索而
得女正北方之卦黑者北方之色女之位凡此皆婦

人所用之正色故鞠衣展衣緣衣不獨后服之外內命婦亦服之

鄭康成曰素紗今之白縛六服皆袍制以白縛為裏

使之張顯今世有紗縠者名出於此

○黃氏曰謂素紗以白縛為裏

未必然毛公曰禮衣有展者以丹縠為衣又曰締之靡者為縠是當暑絆延之服展衣丹縠似與司農合然以意求之縠締宜素紗為類鄭曰後世紗縠名出於此素紗單薄之稱是則當暑別有此服其制亡不可攷○陳君舉曰祿衣冬衣素紗夏衣如書所謂藻火粉米黼黻締繡夏則締冬則繡更不必多說○史氏曰婦人以正潔為體以疏通為用六服必以素紗為裏素白也紗疏也先王為衣服之義所以寓戒

總論

湯氏曰狄當作翟翟是首飾所謂副也禕搖屈鞠展
祿皆衣名詩云玼兮玼兮其之翟也鬢髮如雲不屑
鬚也今俗云翟髻是也下文云嗟兮嗟兮其之展也
蒙彼縐絺是繼袷也鄭康成據此知展是白衣然則
祿衣黑展衣白鞠衣黃亦三色相次

王氏詳說曰玉藻云王后禕衣夫人揄狄又云君命
屈狄再命鞠衣一命禮衣士祿衣又云惟世婦命於

奠繭其他則從男子鄭氏以意約而解之謂世婦命於奠繭之文宜在夫人揄狄之下蓋前所謂夫人揄狄謂王后夫人下所謂君命屈狄者謂子男之夫人且六服之制王后褱衣夫人而下無復有褱衣矣明堂位謂夫人副褱云者直謂魯設耳魯為上公之後得用此禮與二王之後禮一同夫人揄狄則內之三人與夫諸侯之夫人亦揄狄矣侯伯之夫人揄狄則子男之夫人屈狄矣此所以知君命屈狄為子男

之夫人言也子男之卿再命故其妻鞠衣大夫一命
故其妻禮衣其士不命故其妻祿衣等而上之上公
之國孤之妻當屈狄卿之妻當鞠衣大夫之妻當禮
衣士之妻當祿衣矣侯伯之國上卿之妻當屈狄下
卿之妻當鞠衣大夫之妻亦當禮衣士之妻亦當祿
衣矣但秦火之後經無正文故說禮者亦無定論要
之可以義起

史氏曰詩人以后妃服澣濯之衣為美今此所用六

服之彩繪得無相戾耶蓋六服者祭祀賓客朝王所用所謂禮服法服至其常御者澣濯之衣可也

鄭鍔曰天子六服有章數之殊備物而尚文王后三服無章數之異守一而尚質惟其尚文故日月山龍而下有鷩有毳其物十二惟其尚質故純用狄而已以王服之章十二推之則后服亦刻十二以為飾何則文質雖殊而合體同尊法天之大數也

辨外內命婦之服鞠衣展衣緣衣素沙

鄭鍔曰內命婦之服惟此三等外命婦之服視其夫之爵其夫孤則服鞠衣其夫卿大夫則服展衣其夫士則服緣衣或者謂在內之臣有公卿大夫士之殊在外之臣有公侯伯子男之等三等之衣上不及王公之妻外不及諸侯之妻何也竊以為諸侯之妻從其夫之命數而三公之妻不可以常制論以次而推三公之妻宜服闕狄

○鄭氏曰三夫人及公之妻其闕狄以下諸侯之夫人掄狄子

男之夫人亦闕狄唯二王後禕衣

三公出封則為大國之君以君子

借老之詩觀之衛乃侯爵耳詩人言夫人之服則曰
其之翟也其之展也上三衣有翟下三衣有展其下
王后一等無禕衣而已三公之妻蓋如是也何則三
公在朝屈於王則服子男之服其妻亦屈而服子男
之妻闕狄耳出封則宜加禮記有夫人屈狄之文又
有夫人副禕之文夫人屈狄者指三夫人言之夫人
副禕者指上公之妻或者又謂內命婦之服九嬪則
鞠衣世婦則展衣女御則緣衣然九嬪而上有三夫

人自夫人以至女御凡四等此所辨者止於三服何也竊以為三夫人之服亦不可以常制論蓋三夫人之服自褱衣而下凡有二等有時而揄狄亦有時而闕狄也觀禮經列九嬪世婦女御於內官之列而無三夫人之職蓋尊之也是故中宮有后則夫人之禮屈而服闕狄與三公之妻在朝從子男之妻之服同中宮或闕則夫人之禮伸而服揄狄與侯伯出封其妻則服揄狄之服同內司服之言辨如此而已然所

辨者有三等之殊婦人以純素為本則一而已故皆
素紗

凡祭祀賓客共后之衣服及九嬪世婦凡命婦共其衣

服共喪衰

七雷反

亦如之

鄭鍔曰上文言掌言辨此又言共則非特掌之辨之
又造衣服以共之○賈氏曰祭祀共三翟賓客共展
衣九嬪世婦謂助后祭祀賓客時○鄭康成曰凡者
凡女御與外命婦言及言凡殊貴賤也春秋之義王

人雖微猶序乎諸侯之上所以尊尊也臣之命者再命以上受服則下士之妻不共外命婦唯王祭祀賓客以禮佐后得服此上服自於其家則降焉○賈氏曰自於其家則降見追師註○王氏詳說曰命夫之服助祭於王與夫朝覲他則否命婦之服助祭於后與夫相后見賓客他則否玉藻曰諸侯玄端以祭裨冕以朝是諸侯命服不得私用雜記曰大夫冕而祭於公弁而祭於已士弁而祭於公冠而祭於已是大夫命服不得私用命婦之服其禮亦如之素特牲曰主婦纒笄緇衣則是士之妻不得衣祿少牢曰主婦髮鬢衣侈袂則是大夫之妻不得衣展衣蓋惟祿衣侈袂大夫妻不衣展衣而衣緣衣此共其衣服所以見於祭祀賓客之下

賈氏曰喪衰亦如之者外命婦喪衰謂為王服齊衰於后無服若九嬪以下及女御於王服斬衰於后服齊衰

后之喪共其衣服凡內具之物

王昭禹曰內司服所掌主以共后故生也共其所服及其死也亦無以異於生凡內具之物則后生時所用紛帨線纊之屬亦共之此事死如事生之意

○賈氏曰

案內則婦事舅姑有紛帨之屬故死者入壙亦兼有此數物

縫人奄二人女御八人女工八十人奚三十人

王昭禹曰所謂女御八人非王宮八十一女御之數

○鄭康成曰女工女奴曉裁縫者○鄭鍔曰詩云摻
摻女手可以縫裳女御於王與后之衣服無所不為
則縫人掌縫線之事女御製之縫人縫之為女御役
也然王及后之衣服固非一種豈二人之奄所能盡
縫哉然以掌王宮縫線之文考之竊意只掌縫之線
耳蓋衣服之縫自有女御○史氏曰布帛之成可謂

難矣苟剪裁不中度則棄為無用之物而紉縫亦倍費力矣先王知其然立縫人之官以司之使之專其職熟其制則刀尺鍼縷之未施其長短之程度已定於胷中於是役女御以紉縫則布帛不費而衣服具矣

掌王宮之縫線之事以役女御以縫王及后之衣服○鄭司農曰線縷也○劉執中曰女御縫王及后之服者奄所以董其工而役之裁縫者也女御所以取其

制授之修短者也王及后至尊非女工可得度量

喪縫棺飾焉

鄭康成曰孝子既啓見棺猶見親之身既載飾而行遂以葬若存時居于帷幕而加文繡喪大記曰飾棺君龍帷三池振容黼荒火三列黻三列素錦褚加偽荒纁紐六齊五采五貝黼翼二黻翼二畫翼二皆戴圭魚躍拂池君纁戴六纁披六此諸侯禮也禮器曰天子八翼諸侯六翼大夫四翼漢禮器制度飾棺

天子龍火黼黻皆五列又有龍翬二其戴皆加璧○
王昭禹曰王及后之喪則縫人縫棺飾不言王及后
則蒙上文可知

衣

於記反

翬

所甲反

柳之材

賈氏曰鄭喪大記注引漢禮翬方扇以木為匡廣三
尺兩角高二尺四寸柄長五尺以布覆之○王昭禹
曰翬如方

扇持之以蔽棺柳陰木為之故喪車謂之柳車翬以
木為體用綵繒衣纏之以為飾故曰衣翬柳之材

鄭康成曰柳之言聚諸飾之所聚○賈氏曰二者皆

有材縫人以采繒衣纏之乃後張飾於其上

掌凡內之縫事

史氏曰凡內之縫事悉掌之者知縫人於吉凶衣服之制度無不熟

染人下士二人府二人史二人徒二十人

鄭伯謙曰鍾氏染羽以充國之用染人掌絲帛以充王后之用內固不可以兼外先王防微杜漸之意○薛平仲曰內司服之與縫人既皆以奄人主之染人

亦宜以奄人可也特付之命士何哉蓋縫線雖當便於內而采彰之正豈容使便於內哉此染人所以命下士

掌染絲帛

劉執中曰染絲帛者染而後織者上也織而後染者次也

凡染春暴

步卜反練

史氏曰凡染事所以設色於布帛線縷以供帷幕幄

帟衽席衣服之用故春云暴練欲其白而受采昭○王

曰恍氏練絲帛皆
晝暴諸日是也

○賈氏曰春陽時陽氣燥故暴曬

之

夏纁

音
勳玄

鄭司農曰纁絳○鄭康成曰纁玄者謂始可以染此

色者玄纁者天地之色以為祭服

○賈氏曰凡六冕
之服皆玄上纁下

故云為
祭服

石染當及盛暑熱潤始湛研之三月而後可

用

○賈氏曰夏暑熱潤之時以朱湛丹秫易可和釋
故夏染纁玄○王氏詳說曰夏纁玄則攷工鍾氏

也其職曰三入為纁五入為緌七入為縹
縹雖不言玄鄭氏謂玄在緌縹之間
○王昭禹曰

纁者黃而兼赤色玄者赤而兼黑色
○鄭鍔曰纁黃而赤法陽夏則

陽用事位在南方染纁宜矣

秋染夏戶雅反

鄭康成曰染夏者染五色謂之夏者其色以夏狄

為飾禹貢羽畎夏翟是其總名其類有六曰翬曰搖

曰曷曰笛曰希曰蹲其毛羽五色皆備成章染者擬

以為淺深之度是以倣而取名
○賈氏曰其類有六已下並爾雅文秋氣

涼可以
染五色
○鄭鍔曰秋則氣收而不散五色此時亦皆

受采故染文明之色

○王氏詳說曰染夏雖不見於考工而畫績之事有五采備之

文不然則筐人之職○王昭禹曰七月之詩言八月載績載玄載黃我朱孔陽為公子裳蓋於是時五色皆可以染然染人以夏言纁玄與詩不同者蓋染纁玄者始於夏秋則文雜而成章之時故染五色者備於此時

冬獻功

賈氏曰纁玄與夏總染至冬功成並獻於王

總論

鄭鍔曰禮記言后蠶之事謂及獻功之時則朱綠之
玄黃之以為黼黻文章祭服之色皆後宮所為此專
責之染人之官者蓋后宮所染者專以供王之祭祀
染人之官則供國家之禮事其染不一種先王立事
無所往而不法乎天時況衣服之色取法陰陽以遠
不衷之戒尤欲其色之正此染人之言四時所以為
尤備

掌凡染事

易氏曰掌凡染事不特絲帛而已○史氏曰天下之染必因草木土石而成布帛線縷先王取其色以配四時之宜以定上下之分皆所以為禮然先王取色以為禮後世因色以起妄故傳曰五色令人目盲使知所謂色者出於草木土石不足為吾損益則目不盲而視天下之色姑以為禮設耳此周官之意

追丁回師下士二人府一人史二人工二人徒四人

鄭康成曰追治玉石之名詩云追琢其章○王昭禹曰掌后首

飾而謂之追者以其有追衞筭之事而副編次亦有玉以為之飾

薛平仲曰服飾既有以謹諸身矣則俯仰於一身之間者首服服屨尤不可有一之或略嘗疑周官於王之五冕掌之政典之弁師而追師屨人掌王后之首服服屨領於大宰何哉大抵君尊之分固臣下之所易嚴而婦飾之美則人情之所易誘夫上而飾之於首追師有定式下而飾之於足屨人有定制不主於奄人女奚之屬而主於外庭之命士不分屬於政典

禮典之官而領於天官大宰之重風化之本所係在
是是固纖悉之必謹歟

掌王后之首服為副編

步典反

次追衡笄

賈氏曰掌王后之首服對夏官弁師掌男子之首服
也

愚案婦人之副翟比男子之冕婦人之次比男子
之弁婦人之纓笄比男子之玄冠婦人之鬢比男
子之免

鄭鍔曰副之言覆所以覆首

○鄭康成曰禮記云君覆首為之飾

卷

古本反

冕立于阼夫人副褱立于東房然則身服褱

衣首乃戴副也康成謂其遺象若今步繇詩云君子

偕老副笄六珈謂此副也編者編列其髮以為之如

後世之假紒康成謂服之以採桑然則身服鞠衣首

戴編也次者次第其髮髻也詩云鬢髮如雲不屑髻

也正謂此耳康成謂服之以見王然則身服祿衣首

則戴次

○王昭禹曰后之服六首服有三蓋以一當二副配褱揄編配闕鞠次配展祿詩言

副言髻而不及編蓋副者飾之上而次者飾之下惟
禕衣可配以副惟祿衣可配以次惟祭服有衡垂于
副之兩旁當耳其下以紃垂瑱左傳所謂衡紃詩人
所謂玉瑱可也詩人又云副笄六珈者蓋自其冠言
之則用衡自其髮言之則用笄衡所以維持其冠而
笄則以約束其髮二物皆用玉故必追以為之○史氏曰

衡其維持冠之帶傳所謂衡紃紃經是矣笄其髻之簪禮所謂女子許嫁笄而字是矣

為九嬪及外內命婦之首服以待祭祀賓客

鄭康成曰外內命婦衣鞠衣禮衣者服編衣祿衣者

服次

○鄭鍔曰后之首服三副非衆妾所得而戴所謂九嬪及內外命婦首服者殆亦編與次而已

○賈氏曰以待祭祀賓客亦謂助王后而服之○史

氏曰祭祀所以見祖廟賓客所以享所尊故首服用

焉以明非祭祀賓客則不用之未必飾○鄭康成

曰內外命婦非王祭祀賓客佐后之禮自於其家則

亦降焉少牢饋食禮曰主婦髮髻衣侈袂特牲饋食

禮曰主婦纒笄綃衣是也昏禮女次純衣攝盛服耳

主人爵弁以迎侈袂祿衣之袂

喪紀共筭經亦如之

王昭禹曰喪紀則筭而又加之以經其共九嬪外內婦所用亦如祭祀賓客之禮故曰亦如之

屨人下士二人府一人史一人工八人徒四人

史氏曰傳曰屨雖新不加於冠古人賤屨而貴冠所以明上下之分此屨人必在追師之後王有弁師后有追師王有司服后有內司服冠冕衣裳無非各有

其司獨於屨人總云者以為不足煩二官○鄭鍔曰
有鳥有屨名官特曰屨人者鳥止於朝覲祭祀時服
之而屨則無時不用也○徐卿曰屨之方以象地乃
列於天官者蓋立天之道曰陰與陽屨雖方而陰列
於天官是天道可兼於陰陽

掌王及后之服屨為赤鳥黑鳥

鄭鍔曰服不同則屨不同屨各隨其服故曰服屨○
賈氏曰后三翟連衣裳而色各異故以三等之鳥配

之玄烏配禕衣則青烏配揄翟赤烏配闕狄○鄭鍔
曰王之烏三赤為上赤者盛陽之色表陽明之義后
之烏三以玄為上玄者正陰之色表幽陰之義王冕
服則烏后禕衣則烏王赤烏之下有白黑二烏后玄
烏之下有赤青二烏此為赤烏黑烏特言其尊者耳
○王氏曰司服言弁則曰弁服弁在上也屨人言屨則曰服屨屨在下也○湯氏曰禕下
曰屨複下曰烏凡烏之內必有屨屨外又加以烏故
云複也屨之與烏理宜同色亦猶裳之與屨同色也

周人衣服大槩三色玄青黑緇之類為一色白素之類為一色纁赤黃之類為一色此三代所尚纁赤周也白素殷也青黑夏也纁赤為上白素為中青黑為下故儀禮爵弁纁裳皮弁素積玄冠玄端三服相次等而上之六曰玄冕五曰絺冕釋文布本又作絺四曰毳冕絺麻衣毳罽衣也詩曰毳衣如璫麻衣如雪三色相次亦可見矣但周人盛服不用白素故烏無白者自漢明帝時諸儒誤讀尚書始為山龍華蟲十二章之

飾而冕服始皆玄衣纁裳故鄭康成謂冕服皆赤烏
宜檢周禮注先鄭後鄭不同處仍以後漢輿服志參
攷之知漢儒衣服非復周制康成蓋時學耳

赤纁

於力反

黃纁青句

音劬

鄭鍔曰縫中之紉謂之纁屨頭之拘謂之絢赤纁者
王之黑烏之飾黃纁者后之玄烏之飾青句者王之
白烏之飾知其然者烏之飾如纁之次故也若夫黃
屨則白飾白屨則黑飾黑屨則青飾知其然者屨之

飾如繡之次故也但言此三者見其他猶有烏互相考也考工記言畫績之事青與白赤與黑玄與黃相

次也赤與白白與黑黑與青謂之繡烏屨之飾蓋取

諸此

○史氏曰赤纁所以飾赤烏赤陽色陽以純為貴男子之服詩所謂王錫韓侯玄衮赤烏是矣

黃纁所以飾黑烏黃地道陰以黃為貴婦人之服禮於后之服屨有里烏是也句絢也青絢所以飾素屨青陽也素陰也陽動陰靜動靜不失其節此足容所以重余嘗攷之天子吉事皆

烏上公服冕則烏周公衮衣而詩云公孫碩膚赤烏凡凡是也諸侯服冕亦烏詩云王錫韓侯玄衮赤烏

是也其他則皆屨而已先王正一身以治天下正一家以齊四海一身之所履萬民之所取正一家之所行四海之所隨衣裳之制俱有自然之意義況烏屨致飾於步趨之際可無其義乎故總之名則取致意應物之義絢之名則取拘制其身之義皆以為行戒跬步之間皆中禮節則下而臣民敢不取法哉

素屨葛屨

賈氏曰自赤舄以下夏則用葛為之冬則用皮為之

在素屨下者欲見素屨亦用葛與皮也○黃氏曰王與后皆有六服屨人六屨其下又有葛屨鄭引喪禮冬皮屨夏葛屨其意謂葛屨獨施於凶服耳屨人未言四時之祭祀以宜服之鄭氏遂云祭祀而有素屨葛屨惟大祥時恐非此正明葛屨之所當用葛屨見於經者多不獨施於凶服六服六屨其末出葛屨似對后服素紗為當暑之服士喪禮冬皮屨夏葛屨皆有纒純無他義直以寒暑之宜耳然則屨人所謂凡

四時祭祀以宜服之者亦為寒暑之當變故大裘祭
天先儒疑施於夏至方澤方澤祭地本不與祭天同
姑未暇論然服屨而辨冬夏之宜則大裘恐亦不施
於夏祭先王觀會通以行典禮豈有當暑而服寒者
若言祭則用赤烏黑烏功屨喪屨散屨此隨事之所
宜

王氏詳說曰鄭氏於追師其說皆可取若夫屨人其
說鑿矣且玉藻所謂享天子諸侯衣服冠佩等制甚

詳未嘗及烏屨不過曰在官不俟屨又曰童子不屨
絢又曰弁行剡剡起屨又曰退則坐取屨而已鄭氏
以士冠禮有黑屨白屨纁屨之文以意解而廣之夫
士之冠禮其可為王后與服屨之禮乎漢儒之禮其
可執以為周公之禮乎謂王之吉服有九祭服之六
皆赤烏韋弁皮弁則白烏冠弁則黑烏謂后之吉服
有六祭服之三禕衣則玄烏揄狄則青烏闕狄則赤
烏何祭服之多而烏之少耶后服之少而烏之多

耶謂后之鞠衣黃屨展衣白屨祿衣黑屨何王之屨
絕無而后之屨有許多耶況經有赤舄黑舄而已鄭
氏乃有白舄玄舄青舄焉經有素屨葛屨命屨功屨
散屨而已鄭氏乃有黃屨黑屨白屨焉經有赤纁黃
纁而已鄭氏乃言纁必有絢純言絢必有纁純三者
相將焉又以舄之飾如績之次以屨之飾如繡之次
不知又自畔其說且既曰複下曰舄禪下曰屨今以
白屨黑屨為屨之飾如繡之次又以纁屨為舄之飾

如績之次是以纁屨為纁烏又以爵弁為士之祭服故尊之以為烏其說愈不可曉

辨外內命夫命婦之命屨功屨散屨

鄭鍔曰命夫命婦隨其命而有屨謂之命屨當辨其命之數使無越制而亂其序○鄭康成曰命夫之命

屨纁屨命婦之命屨黃屨以下

○賈氏曰大夫以上衣冠則有命烏士之

命服爵弁則命屨纁屨而已外命婦孤妻以下內命婦九嬪以下不得服烏皆自鞠衣以下故云黃屨以下言以下者兼有卿大夫妻二十七世婦皆展衣白屨士妻女御皆祿衣黑屨功屨次命屨

於孤卿大夫則白屨黑屨九嬪內子亦然世婦命婦

以黑屨為功屨女御士妻命屨而已士及士妻謂再

命受服者

○賈氏曰案司服孤希冕卿大夫玄冕皆以赤烏為命烏以下仍有韋弁白屨冠弁

黑屨故云次命屨命屨據婦人而言其實孤卿大夫則功屨次命烏也九嬪孤妻內子既以黃屨為命屨

功屨之中有禮衣白屨祿衣黑屨故云亦然世婦命婦以白屨為命屨其功屨惟黑屨也女御士妻惟黑

屨為命屨屨而已○史氏曰功屨以人力為之若掌裘之功裘

是也散屨不加功飾所常御及喪屨也○王氏曰散

屨則喪記無絢者也

凡四時之祭祀以宜服之

王昭禹曰以宜服之者各隨其時與事之宜而服之若夏則葛屨冬則皮屨此隨時之宜若吉祭用赤烏黑烏功屨喪祭有素屨散屨此隨事之宜

總論

陳君舉曰王及命夫之服司服掌之其冕弁師掌之而皮臬絲屨皆藏於天官既成而頒焉冢宰制其用而宗伯受之以共服御也漢初有御府令掌御衣服

東西織室亦有令皆屬少府費悉出於禁錢不調之
大農而齊三服官亦主作服輸不過十筭其後浸侈
齊官至歲費數百萬而東西織室官之費五十萬貢
禹奏罷之東都織室不別為令以其令丞屬御府蓋
稍省約至晉宋改御府為中署然則自漢以下所謂
禮部大常尚無車輿章服之辨況節制自家宰乎
車服旗常之類大宰得以會計其財物則用度不至
於亡藝禮官之屬得以辨其禮儀等級則所謂用器

兵革不中度終無有也

夏采下士四人史一人徒四人

鄭康成曰夏采夏翟羽色禹貢徐州貢夏翟之羽有

虞氏以為縷後世或無故染烏羽象而用之謂之夏

采

○王氏曰謂之夏采者其復以冕服備采色馬且喪則哀素幸其生故以采色名官

○夏氏

曰夏采記招魂死事故於末言之○鄭鍔曰此事非

常有之事專設一官意者有是事然後設其列於此

者亦見當屬於天官故耳○黃氏曰夏采掌復無他

事也特建一官者生事盡而死事始也曾子曰啟予
手啟予足詩云戰戰兢兢如臨深淵如履薄冰而今
而後吾知免夫宋穆公曰若以大夫之靈得保首領
以沒於地人主能保其身至此而冢宰之責盡矣復
于四郊必以四人

掌大喪以冕服復于大祖以乘車建綏復于四郊

鄭司農曰復猶始死招魂復魄○劉執中曰王之衮
冕生常服之奉享乎大祖之廟者也王之太常生常

建諸玉路乘於四郊以奉祀者也及其始喪則用以
為復而莫測其神魂奚往也故或以其服或以其乘
或以其建或之其所往而致敬者或之其所居而素
安者或用其所暱而常侍者臯而復之庶幾其神之
復而可生者也孝子盡愛之道無不至是以夏采復
於大廟也復於四郊也祭僕復于小廟也隸僕復于
小寢大寢也○史氏曰人之終也體魄降于地魂氣無不之以平時所服之冕服所乘之車綏呼而復之覲其魂氣之識於物以來招之以附于形體而復生非愛其親者能如是乎○禮庫曰夏采

不可強解
且依注說

總論冢宰官屬

易氏曰大學論治國平天下之道曰欲齊其家先脩其身欲脩其身先正其心此三者統宗會元之地萬化之所從出也今自天官分而論之大宰卿一人而兼之以三公則論道經邦燮理陰陽有以格人主之非心小宰掌建邦之宮刑而正其治於宮闈之間宰夫掌王及三公六卿大夫羣吏之位而正其位於朝

廷之上以至宮正宮伯所掌之官府士庶子凡在王
所罔匪正人使之日聞正言見正行皆所以輔成君
德而納君於當道是固所以為人主正心之端也猶
以為未也以人主之尊不以厚其身無以厚天下而
護養國家元氣之本正在於護養人主之身故其設
官自膳夫而下主膳羞爨亨之味甸師而下主禽獸
魚腊之獻醫師而下主飲食調和之味酒正而下主
酒漿醢醢之物宮人而下主宮舍幕帟之儀使人主

端居九重心廣體胖血氣和平志慮充溢而後民命
國脉始有所恃宜足以享天下之備奉矣而人主之
心自視歆然不敢以自安舉天下之財雖曰王之膳
服不會而總於大宰者莫不有一定之式玉府掌其
器物內府掌其貨賄外府掌其邦布之出入皆有式
法以行之及其用之則司會會其財司書掌其書職
內以下莫不惟法式之是守使人主不以天下自利
而常有以厚天下之利是又所以為人主脩身之端

也猶以為未也六寢六宮深嚴邃密親公卿大夫之時少親宦官宮妾之時多故王者皆以法制裁之夫人不列於官九嬪世婦女御不著其數以見王者嚴於內官之選初不過取而輕擇內宰下大夫之外如內小臣典婦功絲枲縫染追屨之官亦皆上士中士下士為之小夫儉人不得廁迹其間閭寺之徒曾不數十固大異於後世之鳴璫曳組含天憲而握王爵者宮壺朝署事均一體而萬物咸理是又所以為人

主齊家之端莫切於人主之心莫親於人主之身莫重於人主之家大宰皆得以道揆之以至宿衛扈從洒埽使令之徒寢處燕息沐浴櫛頰私猥之事亦莫不皆取正於大宰夫是以政本出於上政權不移於下上下有總攝之政內外無壅隔之勢此大宰佐王之

之大者聖人治國平天下之本見於此矣

陳君舉曰冢宰一職惟制御天子身畔之人一則環衛之人二則供奉飲膳酒漿之人三則出納財賄之

人四則宮中使令之人蓋以此等與天子勢狎或用
內官或用女奚他卿不能誰何所以冢宰盡制御之
秦漢以環衛之人分入光祿勳衛尉以供奉之人分
入少府以出納財用之人分入司農而宮中出入侍
從使令之人分與大長秋是冢宰之職分為三四矣
又曰以今世之官論之自玉府內府而下今皆收入
內藏庫矣自宮人掌舍而下今皆收入修內司矣自
醫師食醫而下今皆收入御藥院矣自膳人庖人以

下今皆御前供奉官為之矣大抵先王所以朝夕親
近士大夫在宮中者自漢晉以來稍稍推出至於天
子所以自奉養於外朝者稍稍引入試以通典攷之
可得一二焉

周禮訂義卷十四